

CAÇA CHE DIRUN SAN PEDRO ADIVE

1 ¹U Simón Pedro, apóstol yahn Dihvo vo Jesucristo, dechúh caça cuh yahn nchuhn che numa cuāco din Dendiohs yuhn vo man, Dihvo vo Jesucristo man, che chitahno ne nduhca nuhn. Che chitahno ne ne, ama ndahca çava ne.

²Ricá Dendiohs che ama din yahino ye nchuhn, din ye che ama ndahca cuahtenan ne. Ricá ihyan che din ye che, nduco vededevano yahn ye man, yahn Dihvo vo Jesucristo man, che chenan cuma ne ne, tumacadino ne che a ihyan min che redin ye che ndah nduco ne.

Nduhca che nahn che cuahtechica ihyan yahn Dendiohs

³Numacuahn vederihquentiyon yahn Dendiohs din Dihvo vo nducuahn che nahn çava che runecade co cuahtechico vo iyehse man, co cuahtenan vo vahchetero numacuahn ro man. Din ye che checadino vo yahn Dendiohs, ihyan min che numacuahn vederihquentiyon chahte yahn ye tendahnun ye uvo, ⁴ne çah ye ndudo yahn ye che ama rignonun chihve çavo vo. Che dinahn nchuhn ndudo min ne, ndevahn ne, metah che quendi ne vedeyeno yahn man ne, cuahtendihco ne nunde, ne ndo ne ihyan ndah nduhca man ye. ⁵⁻⁷Chemin che nducote ritahno ne ne, nahn che runecade cuahtechica ne man, nahn che tahque chahte co vededevano yahn ne man, nahn che din cheche ino ne çava che hua ndere cuahtechica ne, cuahtendihco ne nunde man, nahn che cuahtenan cuma ne vedechahtino man, vedeyahino man, nahn che din yahino ama tama ne vih man.

⁸Me ndete che tihcá din nchuhn numacuahn chedave yahn ne ne, nde tahque conahn ndah ne vederihquentiyon yahn Dihvo vo Jesucristo. ⁹Me ndete che hua tihcá din ne ne, anduhnecá ndete che ve ndutinán man, anduhnecá ndete che a chinán ne che a nchahco Dihvo vo Jesucristo nunde che chahtendihco ne ro menán man. ¹⁰Dihnó, chemin che nde tahque redin yahn che cuahtenun ino ne che a tendahnun Dendiohs nchuhn, nedin yahn ye nchuhn, te ndete che tihcá din ne ne, hua ndá ro che conda ne, ¹¹ne numacuahn vedeyeno ndeva ye nchuhn, cuahtenan ne numacuahn ro nan che rihquentiyon Dihvo vo Jesucristo, ihyan min che ndedevahn ye uvo.

¹²Chemin che andahre a devano nchuhn dehtenduh chemin chan, ne riquendi ne numa ino ne Ndudo yahn Dendiohs che va tah ne, ate quendí ntihyon yán yahn. ¹³Rahcó che redin yahn che quendí yahvé nchuhn numanahn che quenán iyehse, ¹⁴te a te Dihvo vo Jesucristo, checadinó che a nun va che cóh. ¹⁵Namin redirún yahn ne cava che cuahn che ndacá iyehse cuh ne, hua conán ne dehtenduh che tuhchan, ntihyon yan ne adecodehno ura.

Vederihquentiyon chahte che ndondá tah Dihvo vo Jesucristo

¹⁶Yahn vederihquentiyon chahte yahn Dihvo vo Jesucristo man, yahn che va che ndaconan chi tun ye man, che a chicuahn nuhn nchuhn ne, ndiyu ndere cuento che ndedecadino man nuhn cava che cahnceh nuhn ihyan, te man nuhn ndihchero nuhn vederihquentiyon chahte yahn ye. ¹⁷Cuahn che ndeva Dendiohs Chida yavenán ye, chihco ro ye vederihquentiyon chahte che ndahco ye tah ye ne, rahn ye numacuahn vederihquentiyon yahn ye: “Ihyan cuh che Dayá. Yahinó ihyan. Ama yenó cava ye.” ¹⁸Nduco nuhn ihyan cuahn che chahn ye tin ico me nan che ndo diyahn ye, ne a man nuhn chihnevan nuhn ndudo min che rahn Dendiohs nde vahchetero.

¹⁹Chemin che nde tahque richahtino nuhn ndudo che dirun ihyan profeta che chahte ye a rahn me. Nchuhn ne, ndahcá redin ne che rihcovan ne ndudo min, te anduhcá ama yahn che riche, rendihco dave nan che man nde ndá ro che ndaconan chi tun Dihvo vo Jesucristo. Tahn min ne,

anduhneca cuahn che a cochi ri dave, cuahn che quendaḥ yuhdo chahte, ne ama co yeno nchuhn. ²⁰Menan vihca cuedevano nchuhn te nde ama ihyan ne, hua co conahn ye nduco vederendecadino yahn man ye Ndudo yahn Dendiohs che dirun ihyan profeta yahn dehtenduh che va che co, ²¹te man ihyan profeta chahn ne, hua cahndudo ye nduco vederendecadino yahn man ye. A Vaco Ndah yahn Dendiohs din che cahndudo ye.

Sahn rihncheh

2 ¹Van ihyan naciön yahn Israel ne, namin chahte sahn rihncheh che redin ca se che profeta se. Namin van nchuhn ne quendaḥ sahn che numacuahn vederihncheh cacuahn se ndudo che din che conda ihyan. Cuacondaḥ vedame se Dihvo vo Jesucristo, ihyan min che chih ye cava nunde yahn nducoyaco vo, nde cava nunde yahn sahn chahn, ne yahn chemin che a denan co se castigo. ²Ama yahn ihyan dama co ye nduco se, ndere cuahtechica ye, cuahtendihco ye nunde, ne chemin din che ndaca yune che chihnga cahma ihyan yahn ndudo ndah yahn Dihvo vo. ³Nducote ama idihya se, nahn yahn se tume ne, numacuahn vederihncheh cuahndudo se, tico se tume yahn ne. Nde a rahn me ne, a va cade che din Dendiohs castigo sahn.

⁴Va che co se castigo, te nde yahn ángel che chahtendihco ye nunde, hua nchahco Dendiohs yahn ye, dechuh ye ihyan van ruchiyahn, quechiche cadena ihyan, cuahtenun ye van man van rahn nde nda ro che techecade ye yahn ihyan iyehse. ⁵Atihnocā hua nchahco Dendiohs yahn ihyan nunde che chahte ye a rahn me. Din ye che chan co nahn nde chito nune iyehse, ne chihno chih nducoyaca ye. Noé, ihyan min che cahndudo ye che runecade cuahtechica ihyan nduhca che nahn Dendiohs, atenan ihyan min nduco te ndache ihyan ndedevahn Dendiohs. ⁶Atihnocā decuihno Dendiohs ihyan nunde che vate ye yan Sodoma man, yan Gomorra man, din ye che chiche yan chahn nde chihno ndo iya, cava che cah ye, checadino ihyan nunde che cuahte ye adiva che namin va che co ye castigo. ⁷⁻⁸Ate ndedevahn ye Lot, ama ihyan che runecade ye, che ama chi ran ye yahn che ndere chahtechica ihyan chahn chahtendihco ye nunde, te quenán

ye yān vaco ye, ne ndihchero ye mān, chihnevan ye mān, che tihcā redin ye. ⁹Nduco tihcā a retumacadino vo che Dihvo vo Dendiohs ne, rendedevahn ye ihyan che ndah ihyan ye vān dehtenduh che rechuhrihn ye, ne redin ye castigo ihyan che duhtuno ihyan ye nde ndā ro che techecāde ye yahn ihyan iyehñse. ¹⁰Din ye castigo ihyan chahn, menān vihca ihyan che ndere vatechica ye, rahtendihco ye nunde mān, ihyan che reducherino ye vederihquentiyon yahn ye mān.

Sāhn rihñchēh chahn ne, āma duhtuno se, ne hua vahino se ducherino se vederihquentiyon chahte che chenān cuma vaco chihngā, ¹¹andahre āngel che nde tahque chahte vederihquentiyon chenān cuma ye, hua rihquino ye ndāhco ndiya ye vederihquentiyon min nān Dihvo vo Dendiohs.

¹²Nduhñecā ite chano che, nde hua rendedecadino te redin te dehtenduh, vate no te cava che cāhno ihyan ite ne, tihchan sāhn chahn, te andahre nde hua renahn se yahn vederihquentiyon min, ate ducherino se. Chemin che va che cuahno co se nduhcā ite chano chahn, ¹³chuhrihn se, din nunde yahn se yahn che cāh rihñ se ihyan chenāhñ. Vedeyeno yahn sāhn chahn ne, che cuahtendihco se nunde nān nducoyāca ihyan. Nduhñcā dehtenduh che āma chihngā che cāhva rino vo ne, tihchan sāhn chahn. Āma rihtera se vedecuihno, rinduco se nchuhn cuahn che rahtevihco ne, nde yeno ri se che rihñchēh se nchuhn.

¹⁴Nducoyāca ndāhta che rendihchero se ne, nahn yahn se tāhn, cuahn dāma rahtendihco se nunde. Rihñchēh se ihyan tundo che metah conahn ndah ye ndudo yahn Dendiohs. Āma māyon se cava che tico se tume yahn ihyan. Sāhn chahn ne, a ndinda se. ¹⁵A ndinda se, te chacondāh vedāme se ndudo ndah yahn Dendiohs, riquendi se yune yahn profeta Balaam dāya Beor, sāhn min che cava che ndāca se tume ne, din se che chihngā. ¹⁶Sāhn min ne, chihca tān Dendiohs nunde che va ino se che din se, din ye che nte āma burro nduco se, yahve te sāhn nduhcā che rente ihyan, ne hua din se.

¹⁷Sāhn chahn ne, nde hua richihve se. Nduhñcā āma pozo che diya mān, nduhñcā man cuma che rechuh dāma, riquenda yuhne mān, tihchan se. A ndinda se, a va yān nān man nān rāhñ nān che cuahtenun se, co se castigo cuahn dāma. ¹⁸Sāhn chahn ne, numacuahn vedeyāde rahndudo se ndudo che

nde hua cochihve. Rihñcheh se ihyan che a cade ndevahn ye che rahtendihco ye nunde, rinun se ihyan che ndere cuahtechica ye vedeyeno yahn man ye. ¹⁹Rahn se te ndete che tihca din ye ne, cuahteman ino ye, cahcantiyon man ye ihyan, ate hua cuaco chemin, te nde man se hua vatemán ino se, rihquentiyon nunde yahn se sahn. Tihca, te adecodehno nunde che chenán cuma ihyan ne, a nunde min rihquentiyon ihyan. ²⁰Ihyan che a ndedevahn Dihvo vo Jesucristo ihyan yahn nunde che chahtendihco ye ne, ndete che cahcomán ye che nevahñecun ye ihyan min, ndaconan cuahtendihco ye nunde ne, tahque vedin ye che co ro menán, ²¹te tahque ndahca cava ye ndete che nde hua checadino ye ndudo ndah yahn Dendiohs che co che a checadino ye, ne chihcomán ye. ²²Ihyan chahn ne, a chinahn nduco ye ndudo che rente ihyan tuhca: “Yahna ne, rihno rendache te, ne rendaconan te rencheh tun te. Me cuche ne, rihno rine te, ne rendatonun tun te van nchete.”

Va che ndaconun chi tun Dihvo vo Jesucristo

3 ¹Dihno che yahino nchuhn, caça cuh a co o yune che redirun yahn nchuhn, rentihyon yan yahn nchuhn yahn dehtenduh che a devano ne cava che ndedecadino ndah ne yahn. ²Cuenecahco ne ndudo che dirun ihyan profeta ndah che chahte ye a rahn me man, ndudo che chihquentiyon Dihvo vo Jesucristo che dinahn vo man. Ndudo min ne, cahndudo ihyan apóstol, chihnevan ne cuahn che chahn ye yan vaco ne. ³Menán vihca nahn che codevano nchuhn te cuahn che a cochi nino ro che cuihno iyehñse ne, cuahte sahn che ndere cuahtechica se vedeyeno yahn man se. Sahn chahn ne, ducherino se, ⁴ne cahma se: “¿Taca che chi tun Dihve nchuhn Jesucristo? Cah ye ndudo yahn ihyan ndico che chi tun ye, ate nde hua cuaco chemin, te a chihno chih nducoyaca ye, ne iyehñse ne, anduhñeca nde ro che chihñde.” ⁵Tihca cahma sahn chahn, te ducherino se. Anduhñeca ndete che hua devano se che nde menán me ne, nduco ndudo che rahn Dendiohs ne, chihñde cade nan ro man, iyehñse man. Chihco vih ye yahn van nune man, chihco cade ye che ran co cava che ndaca cue yahn man. ⁶Ihyan nunde che chahte ye a rahn me ne, decuihno Dendiohs ihyan, din ye che chito nune

iyehñse. ⁷Nan ro man, iyehñse man ne, va che cuco nduhca che a ndihco cade Dendiohs, nda ro che techecade ye yahn ihyan nunde, din ye castigo ihyan.

⁸Dihno che yahino nchuhn, cuedevano ne te nan Dihvo vo Dendiohs ne, ama ro ne, anduhneca ama mil nduyo, ne ama mil nduyo ne, anduhneca ama ro. ⁹Ihyan min ne, nahn ye che nto ino ihyan nunde yahn ye cava che hua co ye castigo, ne chemin che redin chahtino ca ye. Ndiyu che chinan ye ndudo che cah ye nduhca che rendedecadino ama o ihyan.

¹⁰Dihvo vo Jesucristo ne, ndaconan chi tun ye ro che nde hua rendedecadino ihyan. Nduhca che a denan renda sahn duco ura che nde hua vate ihyan cudado ne, tihca ro min, te a denan nda Dihvo vo. Nda ro min ne, ama yudo co anduhneca ndete che ama dito cune, ne iyehñse man, nducuahn che va man, nducuahn che chenana ro man ne, cuihno cuco.

¹¹Nducote tihca va che cuihno nducuahn ne, nahn che ama runecade cuahtechica nchuhn nduhca che nahn Dendiohs, ¹²nde nda ro che techecade ye yahn ihyan iyehñse. A ro min che chenana rino ne, chenana ino ne che nun conahn. Ro min ne, nduhca che a rahn ri nchuhn ne, nan ro nduco nducuahn che chenana ne, cuihno cuco. ¹³Nduhca che a cah Dendiohs ndudo yahn ye ne, chenana ino vo che nedin ra ye nan ro man, iyehñse man, nan che atenan ihyan che ndah ihyan ye cuahtenan ye.

¹⁴⁻¹⁵Dihno che yahino nchuhn, chemin che numanahn che chenana rino ne che conahn dehtenduh chemin chana ne, codin nun ino ne, runecade cuahtechica ne, ne vatemana ino ne cuahn che nda Dihvo vo Jesucristo. Cuedevano ne te nducote quenana cuma ca ye vedechahtino nduco vo ne, a ndero ndi che ndedevahn ye uvo. Yahn chemin ne, dihno vo Pablo che yahino vo ihyan ne, a dirun ye yahn nchuhn, numacuahn vededevano che cah Dendiohs ihyan, ¹⁶ntihyon yan ye yahn chemin nan nducuahn ca ca che dechuh ye. Nahn cuan ne, vahche, ne chemin che ihyan tundo che hua ndah renahn ye ne, a vih rahn, ne a vih renahn ye. Atihnoca redin ye nan nducuahn Ndudo yahn Dendiohs, redinda man ye ihyan.

¹⁷Dihno che yahino nchuhn, chemin che nducote a devano ne chemin ne, codin ne cudado cava che hua cotahno ne vederihncheh yahn sahn nunde chahn, cahcoman ne che

riquendi ne yune yahn Dihvo vo Jesucristo numa ino ne.
¹⁸Tahque ndah ne, codin nun ino ne cava che nde tahque
conahn ndah ne yahn vedeyahino yahn Dihvo vo Jesucristo,
ihyan min che ndedevahn ye uvo. Ndahca che ndeva vo
yavenan ye cuahn dama. Tihca co.